

Historia di Diccionario y Lista di palabra na Papiamento: di 1829 pa 2014

Ramon Todd Dandaré Mag. Ling.

(Charla teni na ocasion di celebracion di Dia Internacional di Lengua Materno 2014 den Biblioteca Nacional Aruba na George Madurostraat diabierna dia 21 di februari 2014)

Introduccion

For di tempo cu ser humano a inventa escritura el a cuminsa traha lista di e palabranan cu e tabata uza den su bida diario, tanto den e bida profano como den esun religioso. Lengua ancestral manera Sanskriet, Chines y Arabir tin lista di palabra traha hopi siglo prome cu Cristo pa splica, na prome instancia, texto religioso den e propio idioma y despues texto cu a conoce di otro idioma.

Lexicologia y Lexicografia

Ora nos drenta den e ciencia bou di cua trahamento di lista di palabra y diccionario ta cay nos ta haya nos cu dos aspecto: uno ta Lexicologia: e doctrina linguistico cu ta studia ordenamento di vocabulario of lexico di un idioma segun principio cientifico y e otro ta Lexicografia: e parti di Lexicologia cu ta ocupa su mes cu implementacion di e principionan lexicologico den trahamento di diccionario, como tambe di enciclopedia, thesaurus, glosario, lexico, vocabulario etc. Den Lexicografia e pregunta primordial ta: con por haci informacion tocante palabra di un lenga (esta nificacion, ortografia, pronunciacion y uzo) accesibel pa e uzado na un manera atractivo, pero responsabel.

Historia di diccionario na Europa

Na Europa por ripara cu den curso di historia generalmente a cuminsa cu trahamento di lista di palabra y/of diccionario pa splica nificacion (y otro elemento lexicografico) di un lenga cu no tabata e lenga general di pueblo. Tin biaha e lenga aki tabata un lenga stranhero, por ehempel pa motibo di colonisacion of dominio politico of un lenga cientifico, a base di e importancia di e lenga riba tereno cientifico, por ehempel Latin den Edad Medio y Renacimiento.

Na hopi pais di Europa mes a cuminsa cu trabou lexicografico den Edad Medio, a base di loke tabata yama glosario, esta lista di palabra di Latin cu nan nificacion den e lenga di pueblo, por ehempel Hulandes, Frances, Ingles etc., ya cu ta Latin tabata e lenga uza pa siñansa y ciencia. Despues a sigui cu diccionario bilingual di un lenga Europeo moderno pa otro, pa motibo di loke nos a bisa aworay, esta of dominio politico of importancia cientifico di e otro lenga.

Ta te den Siglo 18 numa e prome diccionarionan den un solo lenga a cuminsa sali na Europa. Na Francia a lanta Academia Frances na 1635 y esaki a publica e prome tomo di su *Diccionario* na 1694; na Spaña a lanta Real Academia de la Lengua na 1713, cual a publica e prome tomo di *Diccionario de Autoridades* na 1726, y na Inglatera Samuel Johnson ta publica su *Dictionary of the English Language* na 1755. Na Hulanda mes nan ta cuminsa elabora *Woordenboek der Nederlandsche Taal* na 1851 numa y nan ta bin cab'e apenas na 1998. Te aworaki ni na Aruba ni na resto di ex-Antiya Hulandes no a aparece un diccionario general den nos propio lenga Papiamento so, sino diferente sorto di diccionario di traduccion (sea bilingual of multilingual).